

陳公鏡人先生傳

公諱兆華派名本恕字鏡人萃田公之叔嗣也性篤厚乏文飾志節嶄然不妄言邪視非禮法不行孝父母睦兄弟處世待人藹然和氣未嘗輕假聲色人無不敬而畏之幼而天資靈敏以神童名從邑中彭雲衢先生遊學數載好古敏求文思益進年冠聲噪庠序習舉子業鄉薦連膺厥後教授從遊者接踵而至嘗謂門人曰讀書須堅其德性培其經濟養其名節學期於用用符所學可也至酬應方面亦莫不兢兢致意焉時館同邑余孝廉芳臣家鄉里耆紳擬起寶

塔一座乞擇地點并丐繫辭 公許之謂塔成後必
熾而昌果自塔立境屬功名富貴代不乏人其詳悉
地理有如是者且精岐黃之術心存濟世著手生春
求之卽應曾不以此居奇誠哉材全德備君子人與
君子人也公以道光乙酉年五月初三日未時生同
治癸亥年八月二十一日辰時沒原葬光家衝屋下
藕塘衝山內民國四年改厝山棗衝石頭神土地屋
下魚子衝灣山之陽坐西南朝東北坤艮向迴龍望
祖穴碑豎昭垂爰卽其事約略論之而繫以詞曰湘
水汪汪幕阜鬱蒼生公奇秀穎悟異常少而卓犖長

而堂皇律身有道處世慈祥惜抑厥志大軍未張天
綏以福蘭桂騰芳胥於勿替濟美一堂會修譜乘予
其表彰

平邑向 哲鞠躬敬撰